

**AWIG-AWIG DESA ADAT
TISTA**



**KECAMATAN BUSUNGBIU
KABUPATEN TK. II BULELENG**

ARSIP
DI KANTOR
KEPALA DESA TISTA
Jember 6.83.
J. K. S. -

KEPALA DESA TISTA



**AWIG-AWIG DESA ADAT
TISTA**



**KECAMATAN BUSUNGBIU
KABUPATEN TK.II BULELENG**

P I D A G I N G
 MAKA BANTANG AWIG - AWIG
 DESA ADAT TISTA

MURDHA - CITTA.

| | | Widang. |
|-------|----------|-----------------------------------|
| SARGA | I. | ARAN LAN WEXIDANGAN DESA..... 1 |
| SARGA | II. | PETITIS LAN PAMIKUKUH..... 1 |
| SARGA | III. | SUKERTA TATA PAKRAMAN 1 |
| | Palet 1. | Indik Krama 1 - 3 |
| | Palet 2. | Indik Prajuru 3 - 5 |
| | Palet 3. | Indik Kulkul 5 - 6 |
| | Palet 4. | Indik Paruman 6 - 7 |
| | Palet 5. | Indik Druwen Desa 7 - 8 |
| | Palet 6. | Sukerta lan Pamitegep ... 8. |
| | | Kaping 1. Karang lan Tegal 9 - 9 |
| | | Kaping 2. Pepayonan 9 |
| | | Kaping 3. Wewangunan 9 |
| | | Kaping 4. Wewalungan 9 - 10 |
| | | Kaping 5. B h a y a 10 - 11 |
| | | Kaping 6. Penyanggra Desa 11 |
| SARGA | IV. | SUKERTA TATA AGAMA. |
| | Palet 1. | Indik Dewa Yadnya 11 - 14 |
| | Palet 2. | Indik Rsi Yadnya 14 - 15 |
| | Palet 3. | Indik Pitra Yadnya 15 - 18 |
| | Palet 4. | Indik Manusa Yadnya 18 |
| | Palet 5. | Indik Bhuta Yadnya 18 - 19 |
| SARGA | V. | SUKERTA TATA PAWONGAN. |
| | Palet 1. | Indik Pawiwahan 20 - 21 |
| | Palet 2. | Indik Nyapihan 21 - 22 |
| | Palet 3. | Indik Sentana 23 - 24 |
| | Palet 4. | Indik Warisan 24 - 25 |
| SARGA | VI. | WICARA LAN PAMIDANDA. |
| | Palet 1. | Indik Wicara 26. |
| | Palet 2. | Indik Pamidanda 26 - 27. |
| SARGA | VII. | NGUWAH - NGUWUHIN AWIG - AWIG. 27 |

MURDHA - CITTA.

AUM, OM,

Om Swastyastu, Om awighnamastu nama sidham;
 madasar antuk Perda Prop. Tk. I Bali Nomor: 06 tahun 1986, mi-
 wah putusing paseban Krama Desa Adat Tista, gumawe awig-awig
 desa pakraman, maka sepat siku-siku pameneh, wastu kasidhan
 prayojanan mami kabeh prasama angidep mwah amagehaken kadi
 linging awig-awig iki.

SARGA I

ARAN LAN WEWIDANGAN DESA

Pawos 1

- (1). Desa Adat puniki mawasta Desa Tista.
- (2). Jebar kakuwuh wewidangannya mawates nyatur :
 - a. Sisih wetan ring Tukad Yeh Leh.
 - b. Sisih kulon ring Tukad Lintang.
 - c. Sisih lor Desa Adat Sepang.
 - d. Sisih kidul Desa Adat Munduk Tengah.
- (3). Desa Puniki kapah dados 4 (petang) banjar luwira :
 - a. Banjar Dalem.
 - b. Banjar Gunung Merta.
 - c. Banjar Puseh.
 - d. Banjar Dapdapputih.

SARGA II

PETITIS LAN PAMIKUKUH

Pawos 2

Desa Tista ngamanggehang pamikukuh minakadi :

1. Pancasila.
2. Undang - Undang Dasar 1945 pamakas pasal 18.
3. Tri Hita Karana manut sada cara Agama Hindu.
4. Perda. Prop. Tk. I Bali Nomor: 06 tahun 1986.

Pawos 3

Luwir petitis Desa Tista:

1. Mikukuhang miwah ngarajegang Sang Hyang Agama.
2. Nginggilang tata prawertine magana.
3. Ngarajegang kasukertan Desa saha pawongannia se-
kala lawan niskala.

SARGA III

SUKERTA TATA PAKRAMAN

Palet 1

Indik Krama

Pawos 4

- (1). Sane kabawos Krama Desa inggih punika kulawarga sane mag-
gama Hindu, inggihan sane ngalinggihin karang desa utawi

tan ngalinggihin karang desa tur sampun alaki -rabi sa-
ha nyungsung Kahyangan Desa.

(2). Sajaba punika kabawos tamiu.

Pawos 5

Krama Desa wenten 2(kalih) pawos, luwire :

1. Krama ngarep, kulawarga sane mawiwit saking ngawen keh ipun 38(tigang dasa kutus) diri.
2. Krama sampingan, sewos ring kulawarga ngarep ring ajeng.

Pawos 6

Kawit dados Krama Desa wenten 4(petang) soroh, luwire :

1. Wit sangkaning sampun wed ring Desa Tista.
2. Wit saking ngalinggihin karang desa.
3. Malarapan antuk pawiwahan.
4. Malarapan antuk jenek malinggih ngarereh karya ring wewidangan Desa Tista.

Pawos 7

Panemayan tedun makrama Desa :

1. Ngawit saking ngalinggihin karang desa.
2. Tigang sasih sesampun upacara pawiwahan manut dresta.
3. Tigang sasih saking jenek ngarereh karya, utawi patilar rahayu saking desa sewosan kadulurin antuk pailikitan ring Prajuru Desa Tista, risampun kaparitetes olih Kelian Desa tur sampun nawur pananjung batu.
4. Nemonin paruman Desa nuju Anggarkasih.

Pawos 8

Swadharmaning Krama Desa :

1. Sumanggup nyiwi Kahyangan Desa, makadi: Puseh Desa Bale Agung, Dalem lan sapanunggalan ipun.
2. Inut satinut ring daging awig-awig, paswara lan pararem Desa.
3. Sareng miara utawi nitenin sahanan padruwen Desa.
4. Tan kalugra miara "wong istri Tuna Susila".

Pawos 9

Sahanan warga Desa keni ayah-ayahan luwir ipun:

1. Ayah ngarep saking Krama Desa ngarep.
2. Ayah sampingan.
3. Ayah balu saking krama balu utawi krama nyapihan.
4. Ayah deha - truna.

Pawon 10

Tategenan Krama Desa sakadi ring sor :

1. Krama Desa ngarep miwah panyamping keni ayah miwah papeson mamungkul.
2. Krama ngarpe miwah panyamping sane magenah ring dura desa keni pangampel manut pararem.

Pawos 11

(1). Patias utawi piolih-olihan Krama Desa Tista kadi ring sor :

- a. Polih pasayuban Prajuru ngamanggehang luwir patitis.
- b. Kabawosin saha katiwakin pamutus sahanan wicarbabbia.
- c. Nyarengin paruman Desa, saha wenang mastikayang pamutus.
- d. Dados mamilih tur kapilih rikala ngrajegang Prajuru Desa.

(2). Krama Desa kadadosang :

- a. Mapuangkid utawi tan tedun, rikala : mapawangunan ngaraabin, mayadnya, matepetin, nandur, kaluasan kengin tempo wantah apisan sajawaning wenten kabebasan Prajuru.
- b. Nyada mapiteges ngamademang ayah, risampun mayusa 70 (pitung dasa) warsa, kageringan dahat mawuwuh-wuwuh, utawi sinalih tunggil okane lanang sampun makurenan.
- c. Nyada tur nyuksukin, tur sane kawenangang risampunmanggeh deha-truna utawi mrasidayang nganutin krama.
- d. Nutug ayah antuk arta brana (ngampel) manut patangan soang-soang banjar, manawi kajudi antuk Sang Mawangrat, utawi kaluasan selami tiga jantos pitung rahina.

Pawos 12

(1). Wusan dados Krama Desa luwire :

- a. Sangkaning pinunas ngaraga manawi kesah ka dura desa, utawi ngalangkungin segara.
- b. Saking kanorayang duwaning tan prasida ngehehin solah maprawerti satata. mamurug kecap awig-awig
- c. Ninggal Agama Hindu.

(2). Sang wusan makrama :

- a. Patut ngaturang karang ayahan ka Desa.
- b. Tan polih pah-pahan saking padruwen Desa.

Palet 2

Indik Prajuru

Pawos 13

- (1). Desa Tista kaenter olih Kelian Desa.
- (2). Banjar kaenter olih Kelian Banjar.
- (3). Kelian Desa patut :
 - a. Mawiwit saking krama ngarep utawi krama sampingan.
 - b. Kadegang malarapan antuk kacumponin olih paruman pamucuk nyabran 5 (limang) warsa, sajawaning wenten parindik tios tur kangkat kapilih malih.
 - c. Maduluran antuk Dewa saksi ring Pura Puseh Desa.

Pawos 14

- (1). Kelian Desa kasanggra antuk tatinggi luwire :
 - a. Petajuh utawi pangliman pinaka wakilnya.
 - b. Penyarikan pinaka juru surat.
 - c. Petengan pinaka pangemong druwen Desa.
 - d. Kelian Banjar.
 - e. Panureksa arta.
 - f. Kasinoman pinaka juru arah.
- (2). Kasinoman akehnya manut kawigunan saha magilir nyabran sasih.
- (3). Sajeroning ngenterang kasukertan niskala, Kelian Desa mingsinghihang pamangku Kahyangan Desa.

Pawos 15

- (1). Swadharma Kelian Desa luwire :
 - a. Ngenterang palaksanayan sadaging awig-awig, paswara lan pararem - pararem Desa.
 - b. Nuntun tur nganter Krama Desa ngupadi anut patitis.
 - c. Mawosin kalih niwakang pamutus arep ring wicara Krama Desa.
 - d. Nuntun saha nyaksinin tata cara miwah pangaksara ning kauripan mabuat saha ngilitang pakulawangan
 - e. Nureksain sahanan saraja brana druwen Desa.
 - f. Maka dutta Desa matemuang bawos ring sapasira ugi.
- (2). Prade Prajuru Desa iwang panglaksana, keni pamidanda nikel ring kaiwangan soang-soang krama tur yan tan prasida ngesehin solah patut karariyanang manut pararem.
- (3). Sang kadadosang Prajuru Desa patut :
 - a. Krama Desa ngarep utawi panyamping.
 - b. Sampun marabian tur saha maduluran upacara pawiwahan.
 - c. Uning ngwacen tur masasuratan.
 - d. Inut satinut ring sadaging awig-awig.
 - e. Nenten cedangga.
 - f. Pamatut sewosan sane anut.

Pawos 16

Patias utawi piilih-olihan Prajuru/Dulun Desa luwire :

- a. Luput rerampon/papeson.
- b. Luput ayah.
- c. Polih kalih tanding.
- d. Patias tiosan manut pararem.

Pawos 17

(1). Prajuru/Dulun Desa kagentosin riantukan :

- a. Seda.
- b. Pinunas ngaraga wit saking pikahyunan rahayu saha manut panglokika.
- c. Magingsir genah utawi nura desa.
- d. Kanorayang duwaning iwang pamargine manawi nilar sesana.

(2). Nganorayang utawi ngentosin Prajuru/Dulun Desa patut sajeroning paruman tur kaingkupin olih Krama Desa.

Palet 3

Indik Kulkul

Pawos 18

(1). Kulkul ring Desa Tista wenten 3(tigang) soroh :

- a. Kulkul Desa.
- b. Kulkul Banjar.
- c. Kulkul Sekeha-sekeha.

(2). Tabuh tatepakan Kulkul Desa madudonan kadi ring sor :

- a. Tengeran Upacara Yadnya ring Kahyangan Desa :
tung ting, tung ting,
- b. Atuludan alon : tengeran tedun ngayah.
- c. Atuludan bulus tur lantang : tengeran wenten wong : Kaplegandang, kamalingan, kaamuk, kabegalan, kabaak, miwah bhaya pati tiosan.
- d. Kulkul alon 3(tigang) klentungan : tengeran wong kalayon.

(3). Tengeran kulkul soang-soang bebanjaran :

- a. Kalih tuludan : tengeran ngarorod (pangantenan).
- b. Kulkul kalayu sekar (patas seda) :
 - atuludan alon : tengeran mitahuang (kulkul seda).
 - atuludan alon salanturnya: tengeran nedunang Banjar.

Pawos 19

(1). Kulkul Desa utawi Banjar tan wenang katepak yening tan sangkaning pituduh Prajuru/Dulun Desa sajawaning tengeran kapanca bhaya.

(2). Sang nepak tan sangkaning pituduh, patut digelis atur supeksa maka buatan panepaknia, yan tan asapunika wenang sang mamurug kapidanda manut pararem.

- (3). Kulkul Sekeha-sekeha miwah kulkul pondokan-pondokan tan kalugra nyawerin (matehin) sukat utawi tengeran Kulkul Desa/Banjar, prade kapurug wenang keni pamidanda manut pararem.

Palet 4

Indik Paruman

Pawos 20

- (1). Paruman/sangkepan ring Desa Tista luwire :
- a. Paruman Desa kawentenang :
 - nyabran Anggarkasih, macihna suaran kulkul tanpa arah-arah duwaning sampun tetep panemaya manut pararem.
 - napkala (padgata kala) macihna arah-arah manut tatujon.
 - b. Sangkepan Prajuru/Dulun Desa kawentenang manut wiguna.
 - c. Paruman Sekeha-sekeha manut kabuatan.
- (2). Paruman Desa utawi Banjar madudonan sakadi ring sor :
- a. Maka cihna suaran kulkul anut ring pawos 18
 - b. Prasida lumaksana risampun katedunin antuk sang patut ngamiletin abusana nylempod, saha tan kalugra makta gegawan mabuat/sakaluwire.
 - c. Tan maren ngarcana ring Ida Bhagawan Penyarikan maka sarana Widhi Widhana Cane.
 - d. Maka sarana janggi, pangawit kalaksanayang panyacak sep-sepan saha riwusannia nyacak dadosan gung alit manut pararem.
 - e. Tan kalugra ngawentenang suara gora utawi biyota yan wenten asapunika patut keni pamidanda beya pacamil kadi dandaning nguman-uman ring sabha.
 - f. Pamutus bebawos beriuk sapanggul (ingkup) punika sane kamanggehang.
- (3). Prade pidaging paruman tan kaingkupin, mangda Prajuru ngilikang bebawos saha pamutusnia mangda kararemin antuk Krama Desa, bilih tan prasida jantosping tiga Prajuru wenang nglanturang paruman tur ngamedalang pamutus saha pamutus punika wenang kasungkemin antuk I Krama Desa.

Pawos 21

- (1). Sajeroning paruman Desa, Kelian Desa patut nyiarang pamargin ngenterang Desa pamakas ngeninin indik:
- a. Munjuk lungsuring pakraman saha ayah-ayah, sulur arta brana druwen Desa.
 - b. Rencana Prajuru ngeninin usaha Desa kapungkur.
- (2). Pamutus paruman Desa sinanggeh pararem makta pamitegep plaksanayan swig-awig.

Pawos 22

- (1). Sangkepan Prajuru kawenangang wantah ngarincikang pangran cana usaha Desa kapungkur.
- (2). Sangkepan Prajuru tan wenang ngamedalang tategenan ring Krama Desa sadurung kaingkupin antuk Krama Desa.
- (3). Pamutus sangkepan Prajuru ngawetuang paswara maka pidaging pituduh sang ngawewenang utawi ngonekang pecak pararem Krama Desa.
- (4). Sangkepan Sekeha-sekeha patut atur supaksa ring Prajuru Desa, prasida tan lempas saking patitis.

Palet 5

Indik Druwen Desa

Pawos 23

Druwen Desa Tista kadi ring sor:

- (1). Kahyangan Desa luwire: Puseh Desa Bale Agung, Dalem.
- (2). Setra :
 - a. Setra alit lan setra agung matunggilan genah, magenah ring soring Desa.
 - b. Pamuunan magenah ring soring Desa.
- (3). Tanah karang Desa :
 - a. Tanah genah Bale Desa malinggah 0,10 Ha
 - + 10.000 x b. ~~Tanah genah Sekolah Dasar no. 2 Tista malinggah~~
+ pura + setra . 0,28 Ha.
 - x c. ~~Tanah genah SMP. Negeri 2 Busungbiu ring Tista malinggah 0,475 Ha~~
- (4). Ilen - ilen luwire :
 - a. Gong Gede abarung.
 - b. Kulkul.
 - c. Rejang.
 - d. Pendet.
 - e. Shanti.
 - f. Pratima lanang istri ring soang-soang Kahyangan Desa.
 - g. Keris Pusaka : asiki magenah ring Pura Puseh.
 - h. Keris Pusaka : asiki magenah ring Pura Gunung Merta.
 - i. Batu Taulan : lelima magenah ring Pura Gunung Merta.

Pawos 24

Pangrawuh utawi piilih-olihan Desa luwire :

- a. Urunan saking Krama Desa.
- b. Paica saking Guru Wisesa.
- c. Dhana Punia saking warga Desa.
- d. Paica-paica sewosan sane patut.

Pawos 25

- (1). Prajuru wenang ngetangang druwen Desa miwah piilih-olihannia.

- (2). Piolih-olihan Desa kanggen ~~pebea~~ pangaci-aci ring Kahyangan Desa utawi kanggen prabea wewangunan ring Pura miwah ring Desa.
- (3). Nyabran paruman Desa, Prajuru pangemong druwen Desa ngawentenang parindik ngunjuk lungsuring padruwe ring Krama Desa.
- (4). Sakaluwiring druwen Desa patut wenten ilikitannia.
- (5). Tan kalugra ngadol utawi ngesahang padruwen Desa, yan tan kaingkupin olih Krama Desa saha kailikitayang.

Pawos 26

- (1). Tan kadadosang makarya karang utawi ngawangun pakubon ring tanah druwen Desa, sadurung polih panugrahan saking Desa.
- (2). Wewangunan sane wenten ring karang Desa keni utpeti manut pararem.
- (3). Sang mamurug kadi kecap ring ajeng (1, 2) wenang keni pamidanda manut pararem tur wewangunan punika kagubar.
- (4). Tanem tuwuh sane wenten ring karang Desa wenang manjing ka Desa.

Palet 6

Sukerta Pamitegep

Kaping 1

Karang lan Tegal

Pawos 27

- (1). Krama pangemong karang desa (tanah sane tan keni tigasana) patut ngawatesin karang inucap antuk pagehan utawi tembok, mangda pakantenannia asri.
- (2). Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaulu, sajawaning tanah tegalan taler padruwen ngaraga sane kapiara batese sisi kelod miwah kawuh reh punika mawasta gegaleng kateben.
- (3). Prade karasayang watese inucap ngalikadin, yan pada arsa panyandinge kengin watese nganggen pinget kewanten kasaksinin olih Prajuru Desa utawi utawi pracihna pal saking Badan Pertanahan Nasional.
- (4). Prade ~~wanten~~ karang kabebeng mangda kautsahayang wenten pamarginnia.

Pawos 28

- (1). Sinalih tunggil Krama Desa tan kapatutang :
 - a. Ngalah - alah margi, tegal ayahan Desa, karang Desa, lan sapangggalanipun, miwah karang druwe Krama tiosan.
 - b. Ngalah - alah tanah tegak Kahyangan, setra lan sekancan tegak sinanggeh suci.

- (2). Prade wenten kadi ring ajeng, sang ngalah-alah punika patut ngwaliang tanah sane kalah-lah, saha keni pemidanda manut pararem, kadulurin upakata ring ring panglah-lah tegak suci.

Kaping 2

Pepayonan

Pawos 29

- (1). Ngawit nandur pepayonan tanem tuwuh patut adepa agung ngajeroang saking watese, prade jantos ngaliwat wates, wenang kasepat gantungin.
- (2). Prade wenten tetanduran ngungkulin malih mawastu mayonin kapisaga, patut kawara antuk paiguman sane becik, prasi-da sang nruwenang wit ngarebah utawi notor.
- (3). Prade sampun kawara sakadi ring ajeng, taler tan wenten usaha sang nruwenang wit, kengin sang rumasa kajerihan/katetehan, mangda nyadokang ring Prajuru, tur risampun kaparitetes, kalugra ngicalang wit inucap sakewanten patin pepayonan patut katawur manut panglokika sang nepasin utawi kawaliang ring sang madruwe.
- (4). Sang keni pamidanda panyangaskara saha prabea manut pararem arep ring wewangunan sang karubuhan luwire :
- a. Sang nruwenang wit sinanggeh mayarin prade pangkat ngrubuhin wewangunan Krama tiosan.
 - b. Sang notor, munggul utawi ngrebah taru tur ngrubuhin wewangunan Krama tios.
- (5). Krama Desa patut ngamanggehang kawerdian tanem tuwuh sane ngawinang Desane asri tur lestari.

Kaping 3

Wewangunan

Pawos 30

- (1). Nyabran ngawangun patut:
- a. Masadok ring Prajuru ping ajeng prade wewangunan ngeninin wates.
 - b. Ngangge Asta Bumi miwah gagulak Asta Kosala Kosali, sanistane manut ring patitis niskala.
 - c. Tan nyayubin kapisaga.
- (2). Prade wewangunan jantos nyayubin bilih-bilih temboke ring telenging wates risampun kawara tur kasadokang ring Prajuru, wenang kadanda manut pararem saha temboke inucap kengin kagubar utawi sanistannia mangda kakaryanang abangan.

Kaping 4

Wewalungan

Pawos 31

- (1). Sahanan warga Desa sane mamiara wewalungan (bawi risampun mabelas utawi banteng lan sapanunggalan ipun sampun

- masaluk tali) patut sayaga nitenin negul utawi nglogor mangda tan ngrusakin karang utawi pabianan Krama tiosan, bilih-bilih jantos ngranjing ngaletihin Kahyangan.
- (2). Prade wewalungane malumbar utawi ngeleb ngrusakin pakarangan utawi pabianan Krama tiosan, risampun kawara kengin kataban tur kadanda ngwaliang wit sane karusak saha nawur panebus papiaraan manut panglokika Prajuru.
 - (3). Prade jantos ngletihin tegak suci, minakadi Pamerajan (Sanggah Kamulan), Kahyangan Desa, risampun kaparitetes antuk Prajuru wenang sang nruwenang kapidanda Pamrayascita manut dresta miwah panglokika Prajuru Desa.
 - (4). Krama Desa patut nyanggra wewalungan miwah sarwa prani tan patut ngamademang paksi miwah nuba ulam miwah sane tiosan.

Kaping 5

B h a y a

Pawos 32

- (1). Parindik bhaya luwire :
 - a. Jiwa bhaya, kabayu bhaya, kageni bhaya, katoya bhaya (kabengawan), kalindu bhaya.
 - b. Arta bhaya (kabaak, kamalingan) miwah dura cara ring Agama.
- (2). Sang manggihin kehanan bhaya patut nepak kulkul bulus pitulung manut pawos 18 (2) aksara c.
- (3). Prade ring Desa wenten jiwa bhaya patut Desane ngawentenang Bhuta Yadnya tur sang mayanin katur ring sang Ngawewenang.
- (4). Prade wenten jadma mamisuh utawi nguman-uman jadma tiosan tur kasadokang ring Prajuru kakeninin panidanda bea pacamil tebasan prayascita.

Pawos 33

- (1). Sang manggihin kahanan arta bhaya (kabaak) patut ngulkul mapitulung anut ring pawos 18 (2) aksara c, utawi sang kamalingan atur supeksa ring Prajuru sane pacang nimbaingin/nandanin anut daging KUHP. saha mawuwuh panyangskara prade wenten jadma ngamaling barang sinanggeh suci.
- (2). Pratingkahe mapailon ring dusta kabawos saruron, prade wenten jadma manggihin maling tan nyadokang ring Prajuru, jantos jadma tios nyadokang/nyaduang, patut kapidanda kadi dandaning maling, sakuweh pangarsan wit anut cacakan Banjar, tur prade jantos ping tiga mlaksana asapuriṅka, wenang kasukserah ring Sang Ngawewenang.
- (3). Prade wenten jadma ngarereh reramon minakadi: daun kelapa, ron, tan pasadok ring sang nruwenang wit, prade kacunduk (katara) patut kadanda kadi dandaning maling.
- (4). Yening wenten jadma ngranjing ring pakubon wiyadin pa-

- karangan rikala suwung, mawastu sang madruwe karang kacialan, wenang jadma inucap katuwekang antuk madewa saksi ring Pura Puseh Bale Agung.
- (5). Mangda tan katuwekang manut kadi ring ajeng, asing-asing ngranjingin kubon Krama tios patut:
- a. Matengeran suara (makawukan).
 - b. Ngantos sang nruwenang karang rawuh utawi masadok ring pangapit pinih nampek, maka buatan pangranjingnya.
 - c. Pamedal karangnia kadagingin sawen maka cihna pa ngarah rikala suwung.

Pawos 34

Yan hana jadma ngamaling utawi ngrusak druwen Desa patut kaporitetes tur kabawosin olih Prajuru Desa tur keni pamidanda manut pararem, saha panyangaskara prade ngamaling utawi ngrusak barang sinanggeh suci.

Kaping 6

Penyanggra Desa / Banjar

Pawos 35

Krama Desa rikala ngawentenang karya suka-duka patut kasanggra antuk Desa / Banjar luwire :

- a. Prade ngwangun Pitra Yadnya utawi Manusa Yadnya manut panunas sang mayadnya.
- b. Pangrombo Krama arahina miwah salangkungnia patut katuran pangu.

SARGA IV

SUKERTA TATA AGAMA

Palet 1

Indik Dewa Yadnya

Pawos 36

- (1). Palinggih utawi panyiwian sawewidangan Desa Tista luwiripun :
- a. Kahyangan Desa : Pura Puseh Bale Agung, Pura Dalem.
 - b. Pura Gunung Merta.
 - c. Pura Dapdapputih.
 - d. Pura Melanting.
- (2). Rerahinan utawi Pujawali ring soang-soang Pura inucap kadi munggah ring sor:
- a. Pura Puseh Desa Bale Agung ring Budha Umanis Wuku Medangsia.
 - b. Pura Dalem ring Anggarkasih Wuku Tambir.
 - c. Pura Gunung Merta :
 - Ring Purnamaning Sasih Kapat katuran pujawali olih Krama Desa Tista.

- Ring Purnamaning Sasih Kadasa katuran pu jawali olih Krama Subak Abian Gunung Merta.
- d. Pura Dapdapputih miwah Pura Melanting katuran pu jawali ring Purnamaning Sasih Kalima tur kasungkemin olih 3(tigang) Desa Adat (Desa Adat Tista, Desa Adat Munduk Tengah lan Desa Adat Munduk Mengenu).
- (3). Pangaci ring pura inucap manut kecap sastra Agama saha kalaksanayang : nista, madya, utama manut kawentenan lan pararem.
- (4). Pangempon soang-soang Pura kadi ring sor :
 - a. Pura Baseh Desa Bale Agung lan Pura Dalem kaempon olih Krama Desa.
 - b. Pura Gunung Merta kaempon olih Krama Desa miwah Krama Subak Abian, saha magilir nyabran nganem sasih luwire :
 - Krama Desa ring Sasih Kapat.
 - Krama Subak Abian Gunung Merta ring Sasih Kadasa.
 - c. Pura Dapdapputih lan Pura Melanting kaempon olih 3(tigang) Desa Adat, inggih punika : Desa Adat Tista, Desa Adat Munduk Tengah lan Desa Adat Munduk Mengenu.

Pawos 37

- (1). Ring soang-soang pura inucap kawentenang Pemangku.
- (2). Ngadegang Pemangku manut dudonan :
 - a. Nyanjaan utawi masemuran (mapiteges mapinunas ring ajeng Penataran).
 - b. Turunan utawi ngwaris.
 - c. Kacatri (kapilih/kajudi) olih Krama Desa.
- (3). Tan wenang anggen Pemangku luwire :
 - a. Cedangga, luwire : peceng, perot, cungh lan sapanggilan ipun.
 - b. Sang sapisira ugi tan kapatutang manut pararem.
 - c. Sakit ila, ayan, buduh wiyadin edan.
 - d. Sane madrebe kasucian urip tan becik.
- (4). Prabea kapemangkong :
 - a. Adiksa Widhi (mawinten) kamedalin saha kalaksanayang olih sang ngadegang makadi Krama Desa utawi pangempon Pura soang-soang.
 - b. Mapitra Yadnya riwekas patut kamargiyang olih Krama Desa sanistane Brahma Prayascita wiyadin panyanggra manut pararem, prade yadnya kamargiyang antuk warga Siwa Mangku.

- (5). Pemangku patut ngamanggehang sesananing pemangku luwire: tan wenang ajajuden miwah sana sewosan.

Pawos 38

Swadharmaning Pemangku luwire :

- a. Ngenterang Upacara Piodalan ring Kahyangan utawi ring soang-soang pakubon Krama Desa, miwah muput panawuran/sesangi, paneduhan soang-soang pakubon Krama Desa.
- b. Tan wenang salab-sulub, yan mamurug wenang nyepuhin raga.
- c. Rikala Upacara Piodalan sampun ngalang sasih (gelah dadi) wenten sinalih tunggil Mangku, warga dane Mangku centaka sangkaning lampus, upacara kamargiyang olih sinalih tunggil Pemangku Kahyangan Desa.

Pawos 39

Patiyas utawi olih-olihan sang dados Pemangku:

1. Dasar Suci ritatkala aci-aci ring Kahyangan.
2. Arta Daksina panganteb ritatkala nuntun sang mapanawuran.
3. Phala kiwa guling ritatkala wenten sang mapanawuran madaging guling.
4. Miwah sane sewosan manut pamuput patimbang bebawos Prajuru.

Pawos 40

Pemangku kagentosin riantukan :

1. Seda.
2. Pinunas ngaraga yan sampun kacumponin manut pararem.
3. Kageringan lan sapanunggilannya.
4. Kawusanang olih Krama Desa santukan sangkaning malaksana tan patut (asta dusta), yan prade Pemangku kawusanang sangkaning malaksana asta dusta keni pamidanda manut pararem saha ngwaliang prabea inucap.

Pawos 41

Kasukertan Kahyangan kadi ring sor :

- (1). Tan kalugra ngranjing ka Pura luwire :

- a. Sang katiben catur cuntaka makadi sebel saking ngaraga :
 - Sebel kandel ngraja sewala selami dereng mabersih.
 - Sebel madrebe putra selami 42 (petang dasa kalih) rahina.
 - Sebel pangantenan selami dereng mabiya kala.

- Cuntaka sangkaning kapademan/kalayu sekar ngantos masepuh.
 - b. Makta sahanan barang sinanggeh ngaletihin.
 - c. Sato agung sajawaning rikala mapepada.
 - d. Mabusana tan manut kadi tata caraning angranjing ka Pura.
 - e. Sadereng polih uwakan saking Prajuru Desa.
- (2). Pratingkahe tan wenang ka Pura :
- Masumpah (cor) sajawaning pituduh Prajuru.
 - Makobetan, masesenengan, makolem dados asiki lanang wadon, mabacin utawi mawaririh, nyangsang busana, menahin pusungan (santukan punika majejahitan patut nge lung busung macingor lidinnia).
 - Munggah tedun palinggih sajawaning pituduh Prajuru.
- (3). Sang mamurug kecap ring ajeng, keni pamidanda prayascita sapatutnya manut pararem.

Pawos 42

- (1). Yan wenten jadma karawuhan ring Pura kengin kapintonin prade rumasa kasumanangsayan yan tan wiyakti jadma inucap kasisipang manut pararem.
- (2). Prade Kahyangan kahanan durmenggala, minakadi kapanca-bhaya Pemangku patut digelis nyadokang ring Prajuru mang da marumang Krama Desa tur ngawentenang pamrayascita sapatutnya.

Palet 2

Indik Rsi Yadnya

Pawos 43

- (1). Sang pacang madeg Pandita utawi Pinandita minakadi Bali-an Sonteng, Kabayan, Dalang, sakaluwiring jagi ngenterang yadnya, patut masadok ring Prajuru Desa kalih Parisada Hindu Dharma.
- (2). Prajuru Desa patut ngawas nitenin tur wenang ngalangan prade wenten kacihnan sasar kakecap miwah drestane, tur sareng nyaksinin upakara saha nyiarang ring paruman Desa tegap rawuhing wates kawenangan ngenter yadnya, prade sampun nepak ring sastra miwah dresta.
- (3). Krama Desa patut ngaturang ayah sapemadeg miwah ring lebar Sang Sulinggih/Pinandita riwekas katuntun antuk Prajuru.

Pawos 44

- (1). Sang Sulinggih/Pinandita patut ngariinang ring wewidangan jagat Tista, sesampunnya wawu muputang yadnya kajebartios jagat utawi ka dura Desa.

- (2). Krama Desa sami patut sareng ngawas nitenin kaemban antuk Prajuru, mangda sahanan yadnya sane kawentenang kaacen pamuput olih Sulinggih utawi Pinandita manut kawengungannya soang-soang.

Palet 3

Indik Pitra Yadnya

Pawos 45

Pamargin Pitra Yadnya madudonan manut sakadi ring sor :

- (1). Pangupakaran sang kelayu sekar:
- a. Antuk mendem utawi ngeseng, maka cihna makingsan ring Ibu Pertiwi utawi ring Bhatara Brahma selami nuptupang prabea.
 - b. Atiwa - tiwa (Upakara Pengabenan/Palebun).
- (2). Upakara-upakara Pitra Yadnya riwusan kaabenang mawastu munggah don bingih (Ngeroras) wawu kalaksanayang Palinggih Dewa Hyang Bhatara.

Pawos 46

Swadharmaning lan tategenan prade wenten sinalih tunggil Krama kelayu sekar :

- (1). Sang kaduhjitan patut :
- a. Nyadokang ring Kelian Desa/Banjar tur nunas ta-timbangan ring kawentenannya.
 - b. Ngaturin Banjar ngrombo makarya eteh-ete kadulurin penyembraha sahasidan.
- (2). Swadharmaning Banjar/Desa :
- a. Kelian Desa/Banjar maritetes pamargin sang kaduh kitan napike pacang kapendem, makingsan riin, utawi lantur kaabenang.
 - b. Prade kapendem raris kawentenang kulkul pamitahu olih Kelian Banjar/Desa.
 - c. Panyanggran Banjar/Desa salantur ipun:
 - soang-soang Krama Banjar/Desa keni patus beras akilogeram, jinah satus rupiah.
 - Ngrombo ngarapin eteh-ete.
 - Ngater kasetra jantos pamendeman puput.
- (3). Tan kengin nyekeh langkungan ring 7(pitung) rahina sajabaning pacang kaaben.
- (4). Tan kalugra nginepang bangbang.
- (5). Tan kalugra mendem rikala :
- Semut sedulur.
 - Kala gotongan.
 - Was Panganten.
 - Purnama utawi Tilem.
 - Pasah Tungleh.
 - Rerahinan Jagat.
 - Piodalan ring Kahyangan Desa.
 - *respati wong*.

- Sandung padem/mendem.

- Nglangkar watang.

- (6). Yan prade wenten mendem/ngahgah sawa tur sawa punika bo-
ya sawa warga Desa patut keni penanjung batu manut para-
rem.

Pawos 47

- (1). Prade wenten Krama lampus sangkaning salak pati/ulah pa-
ti, kengin ka bakta budal tur kaprasteka kadi patut, ri-
sampung kamenggala anuk banten panebusan lan pangulapan
ring Catur pata/perempatan miwah Cangkem Setra.
- (2). Prade wenten lampus sangkaning gering ngalahlah, patut
pendem pramangkin, yan nuju piodalan utawi kasampetan
patut mamargi wengi (surup Surya).

Pawos 48

- (1). Sane kasinanggeh cuntaka miwah sengker cuntakannia saka-
di ring sor puniki:
- a. Cuntaka antuk kelayu sekar/kapademan: masuwe 3
(tigang) rahina.
 - b. Cuntaka ngaben saking nyambut karya Pitra Yadnya
majauman jantos mapegat, riwusan punika kadulur-
in antuk upakara marerebu ring Kahyangan Desa,
miwah ring soang-soang Merajan wenang nunas tir-
ta pangrebuan ring Desa.
 - c. Cuntaka ngraja suwala, tigang rahina ngawit sa-
king ngraja suwala utawi selami durung mabersih.
 - d. Cuntaka ngembasang putra, 42 rahina (asasih pi-
tung rahina), ngawit saking putrane embas utawi
ngantos sampun kaupakarayang makekambuhan tur
maprayascita manut sakadi Agama sane istri, sa-
ne lanang sampun kepus udel.
 - e. Cuntaka antuk karuron selami 42 rahina (asasih p
pitung rahina), jantos sampun maprayascita utawi
mabersih sane istri.
 - f. Cuntaka antuk pawiwahan selami dereng mabyakala
saha upasaksi.
 - g. Cuntaka salah timpal, cuntakannia jantos mapra-
yascita raga miwah prayascita Desa lan Kahyangan
 - h. Cuntaka antuk anak istri mobot tan kawentenang
upacara pabyakaonan olih reraman ipun, cuntakan-
nia ngantos kawentenang upacara pabyakaonan tur
kalaksanayang antuk nganggen keris makacihna
anake alit punika sah.
 - i. Prade wenten anak mamitra ngalang, Kelian Desa
wenang nyangkepang, cuntakannia nyantos kawen-
tenang pabyakaonan.
 - j. Ngembas putra nenten kawentenang upakara pabya-

kaonan miwah upakara pawidi widhanan cuntakannya ngantos wenten sane mameras sang putra, tur sampun kawentenang upakara manut sakadi ring ajaran Agama Hindu.

- k. Cuntaka antuk ngalaksanayang pancabhaya cuntakannya ngantos sampun maprayascita raga.
- (2). Sane katiban cuntaka luwire :
- a. Kelayu sekaran sane kacuntaka :
 - Sang sane kelayu sekaran.
 - Kulawargannya.
 - Bebanjara.
 - b. Ngraja suwala sane kacuntaka:
 - Sang sane ngraja suwala.
 - c. Ngembasang putra sane kacuntaka:
 - Sane ngembasang putra lanang wiyadin istri.
 - d. Pawiwahan sane kacuntaka :
 - Sang sane kaupakara pawiwahan lanang wiyadin istri.
 - e. Karuron sane kacuntaka:
 - Kulawargannya lanang wiyadin istri yan sampun marupa jadma.
 - f. Anak istri mobot nenten kawentenang upakara pabyakaonan sane kacuntaka:
 - Lanang wiyadin istri.
 - Sang sane maraga istri (sane mobot) tan wenten ngangkenin.
 - g. Mamitra ngalang sane kacuntaka:
 - Sane ngalaksanayang mamitra ngalang.
 - h. Ngembasang putra nenten kawentenang upakara pabyakaonan miwah upakara pawidi widhanan sane kacuntaka :
 - Sang sane ngembasang putra.
 - Putra sane kaembasang.
- (3). Tan keneng cuntaka luwire :
- a. Sang Sulinggih lan Mangku Kahyangan Desa.
 - b. Rikala piodalan risampun ngalang sasih/ngalang tengah.

Pawos 49

- (1). Atiwa-tiwa (pengabenan) kalaksanayang antuk:
- a. Nyawa Rsi (Nyuasta Geni) santukan tan ngagah utawi manawi sawa tan kakeniang.
 - b. ~~Sawa~~ Prateke.
- (2). Panemayan pangabenan wenten kalih pawos :
- a. Ngaben dadakan/bah bangun, kadadosang sajeroning 3(tigang) utawi 7(pitung) rahina.
 - b. Ngaben ngamasa (ngerit) sajeroning tempakan/dadi ya.

- (3). Dudonan Pangabenan ngawit saking ngayah (seda) ngeseng jantos pangiriman utawi nganyut.

Pawos 50

- (1). Pepatusan pangabenan wenten kalih pawos :
- a. Ngaben ngamasa luwire :
 - beras kalih kilogeram.
 - kelapa kalih bungkul.
 - taluh kalih bungkul.
 - daun alepit.
 - saang apesel.
 - b. Ngaben dadakan, pateh sakadi ring ajeng.
- (2). Pangingune ring Krama Desa ngawit ngayah anut abot dangan kawentenan karya.

Palet 4

Indik Manusa Yadnya

Pawos 51

- (1). Manusa Yadnya inggih punika upacara-upacara dharmaning manusa ngawit saking patemoning kama-bang sajeroning garba ngantos kelayu sekar riwekas.
- (2). Upacara kadi ring ajeng madudonan sakadi ring sor :
- a. Magedong-gedongan duk pangrempinian ibiang.
 - b. Duk sang kama reka medal.
 - c. Kepus udel.
 - d. Roras rahina.
 - e. Tutug kambuhan (asasih pitung rahina/42 rahina).
 - f. Nigang sasihin (3 sasih).
 - g. Ngempugin (tumbuh untu).
 - h. Pawetuan (oton/odalan) 6 sasih.
 - i. Ketus untu.
 - j. Tutug kelih (ngraja wadone, ngembakin lanange).
 - k. Matatah/mapandes.
 - l. Mawiwaha.
 - m. Mawinten.
- (3). Upacara-upacara inucap nista, madya, utama manut sastra agama saha catur dresta maka buatan Desa dresta ngawinang sima cara Desa.
- (4). Upacara ngamedalang rare kembar lanang istri tan wenten kasungguh manak salah (buncing).

Palet 5

Indik Bhuta Yadnya

Pawos 52

- (1). Bhuta Yadnya inggih punika upacara-upacara pabyakala ring Pratiwi lan Kahyangan, sarwa prani saha babhutan.
- (2). Upacara pabyakala ring sarwa prani:
- a. Ring sarwa tumuwuh rikala Tumpek Pengatag (Pengerah) Saniscara Kliwon Wariga.

- b. Ring sarwa ingon-ingon rikala Tumpek Kandang rahina Saniscara Kliwon Uye.
 - c. Upacara pakala-kalaan ring manusa manut wiguna, bebawos pabyakala (pabyakaonan).
- (3). Upacara pabyakala ring Pratiwi, Kahyangan lan Bebhutan kawastanin macaru (tawur).
- (4). Pacaruan inucap ring ajeng nista, madya, utama manut wiguna kadi ring sor puniki :
- a. Eka sata.
 - b. Panca sata.
 - c. Panca sanak.
 - d. Tawur Agung.
 - e. Panca kelud.
 - f. Rsi Ghana.
 - g. Balik sumpah.
- (5). Sajabaning kadi ring ajeng kawentenang upacara lianan, makadi :
- a. Majot-jotan utawi Yadnya Sesa nyabran wusan ngra tangan.
 - b. Masapuh-sapuh rikala pacang wali ring Pura.

Pawos 53

- (1). Nangken warsa rikalaning Tilem Kasanga kawentenang pakisan/pamlastiyen ka segara, kalanturang antuk Tawur Kasanga, ketah bawose "Ngrupuk" maka cihna pacang mapag rahina panyepian, benjangne.
- (2). Upacara Tawur Kasanga kadi ring sor :
- a. Genah pacaruan kawentenang ring perempatan (catus pata).
 - b. Nyoreang kawentenang "Ngrupuk".
- (3). Brata Panyepian sane kamargiyang antuk Krama Desa luwire
- a. Amati geni : tan kengin maapi-api.
 - b. Amati karya : tan kengin nyambut karya.
 - c. Amati lalungan. : tan kengin malejuasan.
 - d. Amati lelanguan. : tan kengin maoneng-onengan, masuara gora lan sapanunggalanipun.
- (4). Pabratan punika kamargiyang antuk Krama Desa saking semeng jantos benjang semeng, raris kasuarayang kulkul pinaka cihna "Pangembak".
- (5). Sang mamurug kecap ring ajeng keni pamidanda manut param kamargiyang olih patelik/pacalang Desa utawi sambangan.
- (6). Ri wus rahina Nyepi (benjangne) kawastanin "Pangembak" maka cihna pangawit Içaka Warsa patut soang-soang warga Desa ngamargiyang Dharma Shanti.

- (1). Pawiwahan inggih punika patemoning purusa lan perdana ma-
larapan panunggalan kahyun suka cita kadulurin upasaksi
sekala niskala.
- (2). Pamargin pawiwahan kadi ring sor :
 - a. Pepadikan kamanggala antuk pakreman.
 - b. Merangkat utawi ngarorod riin wawu kakrunayang.
 - c. Nyeburin utawi nyentana.
- (3). Pidabdab sang mawiwaha :
 - a. Sampun munggah deha-truna : sang lanang sampun
mayusa 21(selikur warsa), sang istri (wadon) sam-
pun mayusa 19(siang olas warsa).
 - b. Sangkaning pada rena (tan pepaksayan).
 - c. Manut kecaping Agama (tan gamia gamana).
 - d. Kamenggala antuk upacara widhi widhana prade pa-
ngambile sewos agama.
- (4). Pamargin pawiwahan mangda taler nganutin Undang-Undang
Perkawinan (Undang-Undang No:1 warsa 1974) ping ajeng
ngeninin ilikita.
- (5). Prade wenten malaksana gamia gamana, patut kapalasang sa-
ha keni pamidanda manut pararem.

Pawos 55

- (1). Pawiwahan sane kapatitang ring Desa kadi ring sor:
 - a. Mawidhi widhana.
 - b. Kaupasaksi antuk Prajuru Adat lan Dinas, saha sa-
rana Pras Daksina tur tata cara plaksanayannya
manut dresta Desa.
 - c. Kaunggahang sajeroning pailikitan tur katunasang
ring Sang Ngawewenang.
 - d. Matengeran suaran kulkul ring Desa.
- (2). Parabian sane tan manut kadi ring ajeng sinanggeh tan pa-
tut (tan sah).

Pawos 56

Tata caraning parabian sakadi ring sor :

- (1). Sapasira ugi pacang ngawarangang pakulawargan patut masa
dok ring Prajuru, salanturnya Prajuru maritetes manut
tan manut kakecap parabianne.
- (2). Pamargin pepadikan manut dudonan :
 - a. Pakrunan jantos ping tiga saha soang-soang ma-
larapan :
 - Kapertama antuk pacanangan.
 - Kaping kalih pacanangan ring sajeng.

- Kaping tiga antuk tipat bantal kabawos pamuput pepadikan.
 - b. Risampun pamuput raris sang istri kaajak ring pakubon sang lanang saha kalanturang antuk pabyakala.
 - c. Maka cihna pamutus sekala niskala raris kulawarga purusa makta pejati ka Merajan wadone.
- (3). Prade ngarorod utawi merangkat patut:
- a. Reraman lanange ngawentenang pamilaku utawi pejati antuk dutta sakirangnya kalih diri.
 - b. Pagenahan antene tan kengin ring pakubon sang lanang sadereng mabyakala.
- (4). Sajeroning pakurenan/panglakuan patut :
- a. Kamenggala antuk geng pangampura arep ring reraman wadone.
 - b. Kaigumang bawos idih-pakidih utawi palegayan arep ring pasewakan sang ngidih saha dewasa pakerab kambene riwekas.
 - c. Kacihnayang indik kapurusa utawi prade sentana rajeg kajejerang patut ngidih anak lanang sane kabawos pawiwahan nyeburin tur risampun sulur pamasaran kategepin kaunggahang sentana nyeburin.
 - d. Prade pejati tan katerima pakraman kamargiyang jantos ping tiga.
- (5). Pakerab kambean mapiteges upakara tinas apadang (puput) mapikuren duwaning manut sakadi ring sor :
- a. Sajeroning ambe kamargiyang ring sekala niskala antuk serana jejauman miwah pawidhi-widhanan :
 - Jejauman pinaka ngambe/ngadunggang kahyun soang-soang pakulawangan wadone.
 - Widhi widhana pinaka pejati niskala nunas wadone ring Pemerajan Kemulannya.
 - b. Sajeroning bawos kerab plaksana ring sekala:
 - Antuk penyaksi Krama Desa, duwaning karabiang antuk tengeran kulkul.
 - Pamekas penyaksi Prajuru saha ngilikityang.

Palet 2

Indik Nyapihan

Pawos 57

- (1). Pawiwahan prasida kawusanang malarapan antuk palas parabian utawi kepademan.
- (2). Wusan mapikuren riantukan salah sinunggil seda mapiteges balu, makadi balu lanang/balu wadon.
- (3). Palas marabian wenten kalih pawos inggih punika:
 - sangkaning pada lila miwah
 - mawiwit weara.
- (4). Sang ngayat palas marabian patut atur supeksa pailikitan

rihin ring sang rumawos (Pengadilan Negeri) wastu tinas apadang pamutuse kabawos nyapihan wawu Prajuru nyiarang kawentenannya ring Desa.

Pawos 58

(1). Tata cara palas marabian sangkaning pada lila sakadi ring sor :

- a. Nawur prabea saksi sinalih tunggil sami matenga
- b. Pagunakayan polih pahan pada.
- c. Pabekel tetatadan soang-soang kakuasa niri-niri muwah warisan kakuasayang antuk purusa.
- d. Ngawruhin miwah pangupa-jiwan prati sentana manut swadharmaning guru rupaka (kapurusa).

Pawos 59

(1). Prade riwekas sang palas kacihnan adung malih, patut:

- a. Kalaksanayang pawiwahan malih.
- b. Kadanda nikel saking palase, yadiastun wit palase pecak sangkaning pada lila.

Pawos 60

(1). Sang balu kabinayang dados :

- a. Balu luh wit sentana (sentana rajeg) miwah balu luh boya sentana.
- b. Balu muwani kapurusan (wit sentana) miwah balu muwani nyeburin (boya sentana).

(2). Swadharmaning balu inucap patut:

- a. Ngamanggehang pati brata tan kengin ngamargiyang paradara/drati krama.
- MUPDIN* b. ~~Ngawesayang~~ Ngawesayang waris, paguna kajan, tan dados ngadol, ngadeang, makidihang lan siosan punika sajawaning kabebasan saking pianak utawi kulawarga pinih tampek saking kurenannya prade pianak kantun alit-alit.
- c. Kengin ngidih sentana prade wenten pidabdab sadu rung sinalih tunggil padem saha kabebasan antuk kulawarga sinanggeh kapurusa.
- d. Kawenangang mawiwaha malih, prade wenten kabebasan manut aksara ring ajeng.

Pawos 61

Balu kaucap tan pageh sakadi ring sor:

- a. Drati krama utawi paradara.
- b. Matilar saking pakubon tan pasadok jantos 6(nem) sasih.
- c. Lempas ring swadharma sios-siosan tan prasida ngehehin solah maprawerti arep ring pituduh kulawarga purusa.

- (1). Sentana wenten kalih pawos sane kaucap pratisentana miwah sentana paperasan.
- (2). Prati sentana inggih punika sentana sane metu saking pawiwahanne kapatut.
- (3). Prade pawiwahanne tan kapatut kawentenang sentana mangda tan kantun kawastanin babinjat utawi astra yoga kameng-gala antuk panyengaskara olih reramannyane.
- (4). Prade pawiwahane tan ngawetuang sentana kengin ngidih sentana antuk upasaksi sekala niskala sane kawastanin sentana paperasan.
- (5). Sentana rajeg inggih punika, prati sentana wadon (perdana) sane kamanggehang lanang (purusa).
- (6). Sang sane dados kaarsayang sentana rajeg inggih punika:
 - a. Sentana wadon prade tan wenten sentana lanang.
 - b. Sampun kaunggehang antuk upacara.
 - c. Pawiwahan kaceburin, kauttemayang antuk jadma sane magama Hindu utawi jadma sane magama sewosan sane sampun nglaksanayang pamarisudha raga utawi sudi wadani.
 - d. Sane ngamanggehang sentana rajeg patut masadok ring Prajuru Desa tur Kelian Banjar patut nyiarang ring Desa saha ngaturang ring Prajuru Desa.

Pawos 63

- (1). Ngangkat sentana manut dudonan patut maka cihna arta bra na pamrasan sane kaupesaksi sekala niskala.
- (2). Sapasira ugi Krama pacang ngidih sentana patut masadok ring Kelian Desa sanistane asasih sadurung pamrasan.
- (3). Kelian Desa kawakilin antuk Kelian Banjar nyiarang ring sawewidangan Desa sang sapasira ugi rumasa tan lila mangda nyadokang masengker kalih wuku sabanen pamrasan ring Kelian Desa.
- (4). Prajuru Desa digelis mawosin saha ngicenin pamatur nepek ring catur dresta miwah pararem.
- (5). Prade sulur pamrasan tan manut kecaping ring ajeng, Kelian Desa wenang ngadeg sang pacang makarya, saha ngicenin panuntun mangda kapuputang rihin bebawos sulur utawi wicarannya.

Pawos 64

- (1). Paperasan sane kapatutang ring Desa risampun maka cihna:
 - a. Mawidhi widhana pamrasan.
 - b. Kasaksinin olih Prajuru Desa saha kailikitayang.
 - c. Kasiarang ring wewidangan Desa.

- d. Munasang pamikukuh ring Guru Wisesa (Pengadilan Negeri).
- (2). Sane patut kaperas anggen sentana sakadi ring sor:
- Jadma magama Hindu.
 - Papernahang nedunang saking sang meras.
 - Kulawarga saking purusa, prade tan wenten kengin saking wadon, yening taler tan wenten, wawu kengin sakama-kama (saking kahyun).
 - Kauttamayang saking waris pancer kapurusa.
 - Sinalih tunggil mawiwit saking kulawarga tunggal sanggah utawi merajan paibon, lan dagya utawi ngambil anak tios sakewanten sane magama Hindu.
- (3). Kengin ngangkat sentana langkung ring adiri lanang wiya-din wadon.

Palet 4

Indik Warisan

Pawos 65

- (1). Warisan inggih punika tetamian arta brana saha ayah-ayah ngupadi sukerta sekala niskala saking kaluhurannya arep ring turunannya
- (2). Kang sinanggeh warisan luwire :
- Duwe tengah, makadi tegal ayahan Desa, Kahyangan Pusaka siwa krama luwir sapanunggalan ipun.
 - Pamerajan Kamulan.
 - Paguna kayan, utang-piutang.
 - Tetadadan/jiwa dhana, yan sampun katunggalang utawi kagabroang.
- (3). Wawu kengin kabawos warisan prade wenten :
- Sang mapiturun (pewaris).
 - Katurunan (ahli waris).
 - Arta brana miwah tategenan (ayah-ayah) maka cih-na warisan.

Pawos 66

- (1). Ahli waris luwire :
- Prati sentana purusa.
 - Prati sentana pradana (sentana rajeg).
 - Sentana paperasan lanang/wadon. *se Samen*.
- (2). Prade tan wenten sakadi ring ajeng kang sinanggeh ahli waris :
- Turunan purusa pernah ngunggahang rerama lanang, pekak salantur ipun rerama misan mindon.
 - Turunan purusa pernah kasamping makadi : kaponakan miwah mindon.

Pawos 67

Swadharmaning ahli waris patut :

- a. Narima saha ngwasayang tetamian pahan saking kulukurganya makadi: ngempon sanggah, Pura saha pangupa karangnya miwah nyeledinin ayah-ayah pawaris.
- b. Ngabenang pawaris saha ngalanturang upakara-upakara Pitra Yadnya.
- c. Nawurin utang-piutang pawaris sane manut panglokika.

Pawos 68

Pangepahan waris manut ring sor :

- (1). Risampun kalaksanayang Pitra Yadnya lan utang-piutang pawaris buntas katawur.
- (2). Para ahli waris polih pahpahan pada sangakaning pagunakayan sajabaning karang utawi tegak ayahan Desa, kae-mong antuk ahli waris kang sinanggeh Krama ngarep.
- (3). Sinalih tunggil ahli waris kengin tan polih pahpahan prade :
 - a. Nilar kawitan lan sesananing Agama.
 - b. Alpaka Guru Rupaka, sesampun wenten bisama (surat wasiat) saking reramannyane majeng ring Prajuru.
 - c. Sentana rajeg kesah mawiwaha utawi prati sentana nyeburin soang-soang kabawos ninggal kadaton.
- (4). Boya ahli waris kengin muponin pikolih manut dudonan luwire :
 - a. Sentana luh selami dereng kesah mawiwaha utawi alpaka Guru miwah prade madrebe pianak tan kangkenin olih wong tua inucap kengin ngwaris wantah pikolih (paguna kayan) sentana luh inucap kemawon.
 - b. Balu luh wiyadin muwani nyeburin (soang-soang boya sentana).
 - c. Mulih deha utawi truna riantukan ring pawiwahan pecak sampun kabawos ninggal kadaton.
- (5). Pawaris kengin maweweh rikala maurip pinaka jiwa dhana, tetatadan/bekel maka cihna paweweh tetep ring pianak sane kesah mawiwaha.

Pawos 69

- (1). Tata caraning ngedum waris:
 - a. Kawentenang paigum indik pedum waris inucap.
 - b. Yan tan wenten pradida adung katunasang tatimbang ring Prajuru (Kerta Desa).
 - c. Prade taler tan wenten cuapu ring penetes Kerta Desa kengin katunasang ring sang rumawos (Pengadilan Negeri).
- (2). Prade karang inucap kaputusan patut kakusa olih Desa.

SARGA VI

WICARA LAN PAMIDANDA

Palet 1

Indik Wicara

Pawos 70

- (1). Sane wenang mawosin makadi mutusang wicara ring Desa inggih punika Prajuru Desa sinanggeh kerta Desa.
- (2). Prade sang mawicara tan cumpu ring pamutus kerta Desa ke ngin nunasang wicara inucap ring sang rumawos (Pengadilan Negeri).

Pawos 71

- (1). Sahanan wicara mawiwit kacorahan, sakaluwire sinanggeh nungkasin daging awig-awig, pasuwara miwah pararem Desa/Banjar, Prajuru Desa patut digelis mawosin tan ngantos pasadmk.
- (2). Sajaba wicara sakadi ring ajeng patut nyantosang pasadok sang nunas bawos.
- (3). Panepase patut pastika nyantenang iwang patut malarapan Trå Pramana (saksi, ilikita, bhukti) miwah tan maren nepek ring catur dresta.

Palet 2

Indik Pamidanda

Pawos 72

- (1). Desa/Banjar wenang niwakang pamidanda ring Krama Desa sa ne sisip.
- (2). Paniwak inucap kalaksanayang olih Kelian Desa/Banjar.
- (3). Bacakan pamidanda kasisipan :
 - a. Pangampura.
 - b. Ayahan panukun kasisipan.
 - c. Dadosan utawi dedandan arta miwah panikel-panikelannia.
 - d. Karampag/kalelang.
 - e. Kasepekang.
 - f. Kanorayang makrama Desa.
 - g. Panyangaskara.
- (4). Sang nepasin patut masarana/madasar antuk panglokika.
- (5). Arta brana pamidanda sami ngranjing ka Desa.
- (6). Prade wenten Krama miara wong istri "tuna susila" Prajuru kasarengin antuk Krama Desa wenang :
 - a. Mundung jadma/wong istri tuna susila punika saking Desa.
 - b. Sang sane mamiara keni pamidanda manut pararem.

Pawos 73

- (1). Rikala pawanengan ngamedalang jinah papeson/urunan, dadosan/dedandan, pangampel prade leled utawi cedok rikala

- sampun kalugra tempo asamuan wenang danda nikel.
- (2). Risampun nikel mawaneng malih asamuan taler tan nawur we nang karampag tur pikolih pangrampagan masengker asasih prade tan katebus anut sengker asasih, barang rerampagan punmka dados kadol.
 - (3). Tata cara ngarampag/ngalelang:
 - a. Kalaksanayang olih Prajuru, kasarengin olih Krama sakuweh tigang diri maka saksi.
 - b. Sang kalelang sangkaning darsana kambil barangnyane utawi nyawenin tanem tuwuh akehnia manut utang sang kalelang.
 - c. Prajuru masekenang mangda barang sane kalelang digelis katebus sadurung rahina pacang kadol.
 - d. Sang ngalelang tan dados ngambil barang kasinang geh suci tur sane ngamademang pangupa-jiwane sang kalelang.
 - e. Sang karampag tan dados piwal.

Pawos 74

Pamidanda inucap ring ajeng keni buntas risampun sang kakeninin :

- a. Nunas geng sinampura ring Krama Desa riantukan nguwak pasubhaya (pararem) pecak.
- b. Nawur pangargan panguwak pasubhayane duk pacang karampag, kadulurin pamerayascita indik kaiwanganne ring Desa.

SARGA VII

NGUWAH-NGUWUHIN AWIG-AWIG

Pawos 75

- (1). Nguwah-nguwuhin awig-awig Desa puniki kalaksanayang antuk paruman Desa.
- (2). Awig-awig puniki kamargiyang ngawit kaingkupin (kararemin).


Pawos 75

- (1). Sakaluwiring sane wenten saderengnya patut kaanutang ring sadaging awig-awig puniki.
- (2). Sakaluwiring sane durung kabawos sajeroning awig-awig puniki patut kalaksanayang manut tata cara sane sampun ketah mamargi kadulurin antuk pararempararem.


Pawos 77

- (1). Awig-awig puniki kararemin duk rahina: Anggara Keliwon, Wuku Medangsia, Içaka Warsa 1910, tanggal Masehi 21 Pebruari 1989 ring Bale Desa Tista.
- (2). Awig-awig puniki kalingga tanganin olih Kelian Desa kasa rengin Kelian Banjar saha kasaksinin olih Kelian Banjar Dinas miwah Kepala Desa Tista.


(3). Luwir sang ngalingga tanganin :


 Kelian Desa Adat Tista:
 I Made Nita.


Kelian Banjar Dalem.


 I Nengah Tinggal.


Kelian Banjar Gunung Merta



 I Wayan Janji.

Kelian Banjar Puseh


 I Nyoman Dapet.


Kelian Banjar Dapdapputih


 I Kayan Dana.


 Kepala Dusun Tista
 I Gede Tulis Waisnawa.


 Kepala Desa Tista
 I Ketut Siwa.

Camat Bungsui:



Drs. I Nengah Renta.

NIP.: 010049875.


Mengetahui dan telah dicatatkan:

Nomor : 01 TAHUN 1989

Tanggal : 18 MUI 1989.



Kepala Daerah Tingkat II Buleleng:



Drs. Ketut Ginantra.

NIP.: 610001673.